

MITA-DE-GAU

Mita-de-gau cavavo un pous. En cavant, en cavant, atrouvè cènt escut.

Lou rèi de Zibo-zoubo passè 'mé soun armado, e ie diguè : — Que fas aqui, Mita-de-gau ?

— En cavant, en cavant, ai atrouva cènt escut.

— Hoi ! cènt escut ? faguè lou rèi espanta.

— Eto, cènt escut, de bœu louvidor en or.

— Presto-me-lèi, Mita-de-gau. Quand tournarai de la guerro, te li rendrai..

— Tenès, ve-lis-aqui, ie respond Mita-de-gau. E ie douno.

Au bout de l'an, Mita-de-gau maridè sa chato, e pèr ie faire uno doto, venguè vers lou rèi ie demanda si cènt escut.

De-long dœu camin, rescontro lou loup qu'anavo reclaure, e que ie dis :

— Ounte vas, Mita-de-gau, tant matin ?

— Vau à Zibo-zoubo.

— A Zibo-zoubo ! e de que ie vas faire ?

— L'an passa, en cavant, en cavant, atrouvère cènt escut, que prestère au rèi ; e coume la chato se marido, li vau querre. Se vos veni, t'achate uno sounaio pèr estreno.

— Te mouques de iœu, Mita-de-gau ! coume se sabiés pas qu'ai gaire besoun de sounaio ! Mai, pamens, se me la croumpes, tè, ie vau.

— O, te la croumpe.

— Segur ?

— Segur ;

— Fai pessu-pessu.

— Tè, pese ! cese ! à l'infèr tout dubert !

— He bèn ! marcho : ie vau.

E tœuti dous caminon, d'acord coume dos abiho.

Mita-de-gau èro escarrabiha coume un lende, e landavo coume un poule-toun, tant que, dins rên de tèms, lou loup fuguè desarpiouna e diguè cebo.

— Se ie vas d'aquéu pas, moun brave Mita-de-gau, pos ana jouga 'mé ti parié : iœu te laisse : siœu trop las.

— Sies las, coumpaire ? Se sies las, fourro-te soute ma co, te pourtarai.

E zœu ! lou loup s'ajasso soute la co de Mita-de-gau, coume un cœuniœu dins un clot d'œuse.

Au bout d'uno estirado, Mita-de-gau rescontro lou reinard, que courrié la patantœino, e que ie fai :

— Sies bèn esfraia, Mita-de-gau ! Ounte vas trepeja tant vite, que dirias à te vèire, qu'as lou diable au quiéu ?

— Vau à Zibo-zoubo.

— A Zibo-zoubo, bèu bon Diéu ! Eh ! de-que ie vas faire ?

— L'an passa, en cavant, en cavant, atrouvère cènt escut, que prestère au rèi ; e coume la chato se marido, li vau querre. Se vos veni, es la fiero mancara pas badaire e ie faras ti freto.

— As resoun, ie sounjave pas. Vène, anen-ie.

E tout en s'adraitant, estaquèron soun bout.

Mita-de-gau levavo lou pèd net, e trepavo coume un perdigau. Lou reinard ie tenguè proun tèsto uno bello passado. mai pau-à-pau calè, eargu lou gros alen, e boufè pièi coume uno talabreno.

— Quau diàussi te tendrié pèd, se i'naves d'aquéu pas?... Se ie va d'aquéu trin, pos fila davans. Siéu adeja las coume un chin.

— Se siés trop las, tè, fourro-te dins ma cresto.

E zóu ! lou reinard s'amago dins la cresto de Mita-de-gau, coume u auceloun dins soun nis.

Un pau pu liuen, Mita-de-gau atrovo lou Rose qu'anavo, tresanant d'mour, se marida emé la mar bluio.

— Hoi ! ie fai lou Rose, eh ! moute vas, Mita-de-gau, que sies tant aficiouna ?

— Vau à Zibo-zoubo.

— Vas à Zibo-zoubo !.. E que tron ie vas faire ?

— L'an passa, en cavant, en cavant, atrouvère cènt escut, que prestè au rèi ; e coume la chato se marido, li vau querre. Se vos veni, pagu fuieto.

— Siegue, diguè lou Rose.

E se bouton à camina. Lou Rose, lou Rose grand, lou grand Rose, p ie teni lou cop, barrulavo e barrulavo sis èrso tant que sis aigo venien e pesso e treblo coume de mourtié, talamen que se s'arrestèsse pas lèu, n'è plus qu'un grand garrouias.

— Fau avé la pèsto au mourre pèr camina tant vite ! Quau vos que s'abou emé tu ?

— Se sies las, Rose, tè, fourro-te dins moun vèntre : te pourtarai.

E, zóu ! lou grand Rose s'encafourno dins lou vèntre de Mita-de-gau, q fuso coume un fum.

Dins un vira-d'iue, Mita-de-gau fuguè arriba vers lou rèi.

— Lou rèi soupavo emé tóuti si gènt.

— Bon vèspre en tóuti, diguè Mita-de-gau. Eh bèn ! ie sian, ie sian en fatigo ?

— Ai ! faguè lou rèi, es tu, Mita-de-gau ? Eh ! que bon vènt t'adus d'a-quéstis ouro ?

— Vène pèr ço que sabès, de l'an passa...

— Ah ! o !... Sies brave, as bèn fa. Tè, bouto-t'aqui, soupo, e pièi par-laren.

Mita-de-gau s'ataulo, e lou moulin trisso, car fau vous dire que i'avié un tian de faiòu que vous embaumavo.

Quand lou rèi veguè que Mita-de-gau avié lou vèntre plen, ie diguè :

— Eh bèn ! Mita-de-gau, vènes dounc pèr aquéli cènt escut ?

— Devinas, Sire lou rèi !

— Fau te dire, moun bèl ami, que siéu proun en gèino d'aquest moumen. Lou veses coume iéu, la plouvino a tout brula, li vigno soun morto, li cardoun soun à cop de capèu, li garanço soun estrasso de marca, li rentié fan quinquinello. Te poudrai belèu pas tout douna. — Dins tout acò, Jaque dóu Mas-nòu m'a di, l'autre jour, qu'avié vendu soun blad, qu'entre que i'aurien ensaca, m'adurrié li sòu. Deman ie mandarai dire, e se l'an paga, belèu te dounarai tout.

— Oh ! diguè Mita-de-gau, s'es ansin, esperarai : siéu pièi pas tant, tant pressa !... Esperarai, Sire !

— Es pas lou tout, repren lou rèi : ai pòu que siguen court de lié, e que te faguen jaire à la jasso.

— Hòu ! ie respond Mita-de-gau, qu'acò siegue pas vosto peno ; cou-charai ounte voudrés, Sire, e bèn d'ounour aurai.

Coume avié di lou rèi, Mita-de-gau anè jaire à la jasso. Fuguè pas plus lèu desvesti, que lis aret s'amoulounon, picant dóu pèd, e zòu ! sacon lou paure Mita-de-gau, que lèu aubouro la couvo, e crido au loup : Vène m'apara.

Lou loup sort e sagato li moutoun.

Mita-de-gau, Pendeman de matin, emé l'aubo cantavo. Lou rèi, quand l'ausiguè, fuguè tout espanta : s'èro pensa que li moutoun, dins la niue, l'ensucarien à cop de bana.

— Es egau, se dis lou Sire ! aniue, lou farai jaire emé li galino, que lou bequetaran e ie derrabaran lis iue.

Ço que faguè : après lou soupa, (uno gardiano à se lipa li det), lou mandon jaire au galinié. Pas-pu-lèu ie fuguè, que li gau s'engalinon, fernisson

de l'alo, e ie sauton sus la cresto à cop d'arpo e de bè. Quau vous a pas di que revihon lou reinard, tout just quand Mita-de-gau ie bramavo : Reinard ! reinard ! vène lèu m'apara.

Lou reinard sor de la cresto, sauto sus li galino, e fai d'ou galinié un orre cementèri !

Quand la dindiero [venguè l'endeman traire i galino, e que veguè tau chaple, ai ! pauro ! n'aguè li tressusour, e cujè toumba d'un mourimen de cor ! e, plourant, s'entournè counta tout au rèi, que n'aguè granda doulour. Rouvihè proun... mai poudié pas trop se plagne : l'avié vougu. Tambèn, destimbourla, travaïavo de tèsto pèr paga Mita-de-gau e l'enmanda.

Anavo e venié de long en large dins la basso-court, en parlant tout soulet, quand rescontro lou mitroun qu'anavo à la bouscatiero querre uno bourrèio pèr caufa. L'arrèsto e ie vèn : Digo, Brulo-pan, tu que sies un escapoucho, coume fariés pèr te desfaire de Mita-de-gau, un moustre que me fai tripet-pelòri ?

— Tenès, bèu Sire, se voulès oubliada la fournado que faguère chouïo e me rèn rabatre, vous doune un bon counsèu.

— Parlo, respond lou rèi.

— Eh bèn ! mèstre, mandas-lou jaire dins moun four : enterin que dourmira, garnirai bèn plan, boutarai fio, e deman matin, sarès ravi de ma fournado.

Aquelo niue, lou mandèron jaire dins lou four : tre que penequè, Brulo-pan, coume avié di, vèn plan-plan garni lou four e bouta fio.

Mita-de-gau, que dourmié coume un innoucent, gounfla pèr la tubèio, se reviho en tussissènt. De pòu de s'estoufa, subran lacho un boutoun..... e lou Rose, lou grand Rose, ourlant, rapide, escumant, desboundo, emporto tout, la taulo, la porto, la pastiero e lou mitroun, que s'arrambo à la baragno coume un clot de rambiuei.

Aquí, lou rèi n'aguè proun ! Vendeguè li jouièu de la rèino ; paguè Mita-de-gau, que s'entournè countènt de n'escapa, li braïo neto, gràci i tres coumpaire e coumpagnoun qu'avié rescountra long d'ou camin.

Ço que provo, mi bèus ami de Diéu, que quand sias pèr camin, fau toujours faire mounta li gènt que van à pèd e que soun las.

ANSEUME MATHIEU.

Avignoun, Setembre 1877.

Se vous lachas di pèd, tenès-vous bèn di man,